

Christian Meivah

September - October, 2014

Lhani seh thuso

Private Circulation

Thil-nga soh ding

Jesu athia, akivui-a, chule athodoh jouva, ahinga vana lahtou a aumpet chun, seijui hon kidang tah in akaltoupet chu aveuvin ahile pon abangleh kisil mini akomuva ahung ding lhonin, amani chun seijui ho henga, “Galilee gam miho, ibola ding a van lam navet vet-u ham ? Hiche Jesu nakomuva kona van-a kilatou hi, van lama akaltou namu bang bang uva hung kit ding ahi” ati lhon in anahi (Acts. 1:11).

Bible in Jesu hi nikhat hung kit ding ahi, tia aseih seh hilouvin, ipi jeh-a hung kit ding ham tijong aseih jin ahi (Mat. 25:31-46, Jn. 14:1-3). Jesu ahung kit teng soh tei ding thil nga veu hite :

1) Jesu ahung kit tengle athisa ho, atahsan hihen atahsan lou hijongle, huhhingsa hihen huhhing loulai hi jongle, them changsa hihen them changlou lai ho hijongle, Pathen tha hat naa athisa ho chu ahinga hung ki thou doh cheh diu ahi, tin Bible in aseih-e (Jn 5:28-29). Jesua ihmu ho chu phat khat leh thoukit-a Jesu to kimuto dia vana kilatou ding ahi, tin, Paul in aseih-e (1 Thess.4:13-17).

2. Vana lahtouva umding ho chu amelu van vou-a kikhela van lam ajot diu ahi. Lei-a muchi kitu ho ahindoh ding tengle thia, lim choma ahung khandoh tobang ahi (1 Cor. 15:35-54). Vana meilom lah a Jesu Second Coming umding (1 Thess. 4:17), Second Coming teng Jesun lei hi ahinchot lou ding ahi (2 Peter 3:10). Hiche nikho le chun Jesu tah san ahing nalai ho mel chu van vou a kikhela, amaho jong chu Jesu toh kimuto dia van meilom lama lengtou diu ahi.

3. Mihem athisa hingdoh kit ho le ahing nalai ho jouse chu, vana lah touva umchek uva, Pathen mai-a ding uva, Jesun achung thu-u atan ding ahi. Leiset-a peng jouse Pathen thu tanna mai-a dinga, achung thu kitan cheh diu ahi (2 Cor.5:10). Pathenin itoh ibol igel jouse chungu thu ahin tan ding ahin, Pathen iginu angai-e (Eccles.12:13-14). Tuhi ki sih a Jesu tahsana ngaidam kithum phat ahi, thupi tan nikho teng ngai dam thu umponte (Acts 17:30-31). Thupi kitan jou teng mihem jouse ni a kihom khena, Jesu tahsan ho chu van gama dia gotsa hita diu, chule Jesu tahsan lou ho vang chu Damun Mei kouva lelut dia um diu ahi (Mt. 25:46). Hoijoh chu nanga ahidem !

Tun kigon toh in, phasa demin umin Jesua kipelut loi in, geisang khan nate.

4. Second Coming jou teng, van le lei hi mei-in akahvam ding ahitai, tin Peter in asune (2 Pet. 3:10). Ahinla Pathenin ama tahsante din van thah le lei thah afeh din akisei-e (2 Pet. 3:11-13). Keltah le kelngoi kikhen na phat hung lhung ding ahitai.

5. Second Coming tengle Jesun ama lenggam (houbung) chu Pathen afeh ding ahi (Mat. 16:18-19). Hi che joule chun, ima jouse chungu Pathen thanei ding, hichu achaina hiding ahitai (1 Cor.15:24-28). Jesu Second Coming ding phat le nikho hi koiman ahepoi, Jesun jong akihet poi, Pa Pathen bouvin ahei (Mt.24:36, 25:13, Mk.13:32). Ahung kit ni kho hi vannoi leiset kichaini jong hi ding ahi.

Leiset-a mihen cheng talou ding, van jong aum ngaitalou ding, mihemte chu Damun ahiloule Pathen Lenggam a dia kihom khen ding ahi jo tai. Leiset ihinkho uvin kichaini anei banga, ichennau leiset hin jong akichaini anei ahi. Hiche hi phaten ngaiton, nakhonung ding kima suh tup in !

Pakai nikho, Pakai anjon

Sabbath nikho hi Saturday hinte ti inomun, Pakai nikho hi mapni Sunday ahi ti jong inomui. Seventh Day Adventist ho leh christian phabep khat in, “Bible a hoikom muna

2

Pathen houna nikho hi Saturday ti chu Sabbath nikhoa kona Sunday tichu Pakai nikho, mapni tichu haptani masania kikhela a ham?” tin jong adong jiuve. Pakai anjon nikho hou bung chom choma nikho chom chom akimange. Abangin Jesun athi kona sejuite toh anjon nukhah pen anabol chu Thursady nilhah ahi, tin Thursday nin Pakai anjon (Lord’s Supper) hi abolui. Abang in niseh in abole. Abangin kichen jinei nikhon jong abolui. Houbung atamjon vang Sunday nikho hi amangui. Apat le anikho hi ama amaho kinoptona thu ahi jie.

1. *New Testament* : Houbung ana kipat tillai chun, sejuite thuhil dung jui in hou-in ana kai un, Pakai anjon jong hapta nimasa nin ana bolui (Acts 2:42). Acts 20:7 a hapta ni masanin akikhomun, changlah aheh belui. 1 Cor. 16:1-2 a, Gentile hou bung ho Paul in ahilnaa hin, hapta ni masa nin akikhom jiuve, ti akihei. Hiche lai-a hi akikhop tengule Pakai anjon abol tei jiu ahi.

Pakai Jesu thina kona atho doh nikho hi, hapta ni masa ni ahin,oubung masa ho hiche nikho leh ana kikhom un, antheng jon jong ana bol ui. Jesu thodoh nikho hi kitoh tah in Gospel lihon asundoh uve (Mt.28:1, Mk.16:2, Lk.24:1, Jn. 20:1). Sabbath jou nikho hi haptani masa ni (Sunday) ahi, hiche nia hi Jesu thinaa kona thoudoh ahi. Houbung penni, lenggam kiphonni, Lhagao Theng hung ding nikho, Leng

gam kot-hehna Jesun Peter apehni, hiho jouse hi, hapta ni masa nia soh ahi. Rev. 1, a Patmos twikol sunga um John in, hapta ni masani, “Pakai nikho nin keima Lhagaovin kana umtan” ahi, ati. Hijeh hin Pakai nikho ni hi hapta ni masa ni ahin, hi chu Sunday nikho hi ahitai. Bible in Sabbath nikhoa antheng jon kibol, leh Sabbath nikhoa houbung masa ho ana kikhop thu aseipoi. Christian ho Sabbath nikhon Pathen hou din ana kikhome, ti Bible a akimupoi.

Sabbath hi Old Testament khanglai chonna anahin, hichu Jesu cross a kikheth beh a bei-a ahitai (Col.2:14-16, Eph. 2:5). Houbung masa ho chun, hapta ni masani hi ana nit tei uva, antheng jonna dia ana kikhom tei-u ahi.

Hinkho man atam dan

America pasal khat lampia avale pet in, miphalou hon, asang khol jacket chu lahpeh-a jam agou vin, ahinla aman atuh chah kheh in ahile chemin asunlih un, a jacket chu alahpeh tauve. Jacket khat toh ahin kho alheh ahi. Jacket sanga ama hinkho chu manlu joh vang ahi. Idia a jacket chu ana kichu pia, ahinkho achaanlo hintem ! Apamai nah-e !

Bible akisim le mihem in amanlhom khat itna le deinaa ahinna alhaso lona tampi aume. Adam le Eve in nehluo dinga kiseipeh theiga khatsch ana nelhonin, athilo lhone

(Gen.3:6-7). Lot jinu chun Sodom khatvei seh avet leh chi-song asoh jenge (Gen. 19:26). Thuneina leh thaneina adei jeh in, Korah hinkho abei-e (Num.16:31-35). Babylon te von le gou adei jeh in Achan hinkho ana beitai (Josh.7:21-25). Samson in Pathen helou numei Delilah kitinu lunglhai sahna din, ahinkho achaan loi (Judges 16:17-30).

Lengpa laltouna deichat jeh in, Absalom hinkho abei-e (2 Sam. 18:14-15). Lengpilei pupa ahinom jeh in, Ahab hinkho abei-e (1 Kgs. 21:19). Mordecai in Haman jabol naa abohkhu-pa ahou lou jeh in, mi kiltsah Haman chun, Mordecai chu Judah mi ahijeh in, Judah (Jew) se se thadingin lungthim ahin bolin, ahi leh Haman amajoh athilo tai (Esther 3,7). Sum dangka somthun toh ama hinkho chu Judas Iscariot in ana lheh in athilo tai (Zech.11:12, Acts 1:18).

Ananias le Sapphira in Pathen ajoubol lhon jeh in apet pet in athilo lhon in ahi (Acts 5:5-10). Tu lai hin christian phabep in, chom chakhat nopsah ding deina in ahinkho alhaloi (1 Tim.5:6). Mihem hin kho hi mantam tah ahi, Pathena ahi. Hijeh a hi hinkhoa kichep lou ding apha (Mt. 16:26, 1 Jn. 2:15-17). Chom chakhat hinnop ding deinan mi abangin, Pathen doumah abolin, ahinkho akisuhset jie (Lk.12:15). Pathenin asemsa mihem khat hinkho mohseh-a abei ding hi, a-it lheh in, hijeh chun Bible a eihil jingui.

Pakai Taona aloupi-e

Bible hi lungjin lungdon teng meivah ahi. Tulai leiset hi ivet leh thupha kijamo cheh cheh leiset danin akilang tai. School hoa Bible thu akihil lai chun, sekul chapang gitlouna jong ana lhomdomin, tua America school hoa Pakai Taona akisei tahlou phat in, school sunga mi kikapna 31 jen asoh-e. Toronto, Ontario, Ottawa a school hoa tulai hin Muslim te taona amanguve, ti akijai.

Gollhang lungdon, lungjin in achup jeh-a suicide ngaito pa khat hi Hindu Doctor khat henga achen alung boina phatna din lou anahol in ahile Doctor pa chun, “Christian nahim ? Pakai Taona naman jilou ham ?” tin ana donge. Gollhangpa chun, Pakai Taona hi vet louva ka chinpha ahin, nom tah in kasei thei nai, tin ana donbut-e. Chuin Doctor pu chun, “Pakai Taona hi nasei tengle Robot khat seibanga nasei khattou ham ? ‘Vana um ka-Pau Pathen’ tia nasap tengle na-awgin chun na-in *ceiling* chu akhokhel nah em?” tin anadong kit in ahi

Pakai taona hi lunggil tah a akisei tengle mihem hinaa ihatmo na ho chu Pathen thahatna in ahin khu ji ahi (Eccles. 12:7). Seijui hon Jesu henga, taodan neihil un, anati lai-a chu amaho nikhat le ngavei cheng taona mangji ho ahiuve (Lk. 11:1). Muslim ho khu nikhat le nga vei taoji ahiuve. Hichun van gam hi

amaho chenna ding mun ahi, ti ahil chet jiu ahi. Daniel chu niseh in thum vei anatao jie (Dan.6:11). Jesu, Pathen henga, “Vana um ka-Pau” tia anatao chu ajah ule seijui ho ana lung dong tauve. Hiche lai miho’n Pathen chu “Yahweh” (Jehovah) tia amin phah uva, ana kichat lai-u ahi (1 Tim. 6:16). Mihem in Pathen chu thahat thunei tah-a agel uva, anai ngam lou phatlai chu ahi. Lk. 15:18 a Chapa Vahmangpa in, “Kipath doh ingting, ka-Pa koma chekit tange” ati.

Pakai Taona a, “Tunia din kaneh khop diu anneh nei peuvin” kiti hin, Pathena kingai kahi, ti aheth sah ahi. Nikhat Habakkuk in asun an akipoh-a louva akon leh, Pakai vantil khat akoma ahungin buchun khat apen, hiche buchun hi Babylon a keipi hon lah-a um Daniel khu ga pen, atile, Habakkuk in, “Babylon chu mujong kamukha pon, Daniel jong chula kahekha pon, iti kagapeh thei ding ham, tia ahin donbut jenga ahile, Pakai Vantil chun Habakkuk chu asam-buching in aman in, chule Daniel umna keipi bahkai ho lah-a chun ana lehlut tai.

Chuin Habakkuk in, “Vo, Daniel, hingjing Pathen sohpa, Pathenin nahin peh hiche buchun hi ki lah in nen,” atin buchun chu anapei. Daniel chun Pathen in asuhmil lou jeh chun Pathen ana avahchoi in, chule buchun chu ananei. Kintah in Pakai Vantil in Habakkuk chu adom doh in, ama loujaova achuh sah tai

(Dan.14:33-39). Pakai Taona a, ka leiba teu kangaidam bangin keiho bat jong ngaidamin (Pathen), tia kisei pa hi phatea gelchet angai-e. Nang in mi nangaidam loule nang mona ho Pathenin angaidam joulou ding ahi, tina ahin, thillu tah ahi. Hijeh a hi mi iha ngaidam le Pathen ngai damna ichan diu ahi. Mi ngai dam je ikiha themchuh-u angai lhez tai. Pathen ilunglhai sah ule ama a kona phatthei bohna ichan diu ahi.

Gou khol thudol

“Na gou umnaa chu nalung jong um ding ahi” (Lk. 12:32).

1. *Gou number khat* : Leiset-a gou inei hou hi, inle lou, sumle pon, gari chom chom, gamle go, inei hou Jesun ahesoh hele. Jesu seidan chu ahile, hiche ho chu khol hih un, vana gou kikhoh joh un, chutile vana na lungu umding ahi, atina ahi. Min vannoi pumpi nei hen ahinna chaan taleh ipi phachom em, ati (Lk. 9: 25). Leiset-a gou akihoh tengle pap set kiloset, mi nei thangset, kinah le kibau, uma ajonaa thina hiding bou ahi. Hijeh a hi Jesun, hiho hi hol hih un, khol hih un, ati ahi

Neh le sil ding hoa lung kham dauvin, Pathenin jule va hijatpi avah a, pahcha hijat ajep hoi hilou ham, nangho jong Pathen tah san leu chun navah jeng diu ahi, ati. Ilungthim pumpi vana aumna dia van a bou gou kikhoh apha.

2. *Gou number ni* : Chate hi gou ahin, Pathena kona kipa thilpeh ahi (Ps.127:3). Mihon achate chu gou kichina akichin phat le inchen dohna le kihinsona anei uva lungmonga hinkho nomtah-a hingkhom jiuva ahin, o-chat chat uma ahive. Gou chingthem lou ho chu guchan aguh peh jie. Nacha nakichin them loule satan in naguh mang peh ding ahitai.

Cha hi Pathena kona kipa thilpeh ahi. Tekah in, koiham khat in kipaman in Mobile phone khat ei pen, asunga chun kadei jouse ka khumin, kangailut ho min ho ka khumin, mi kakihoupi nom nom ka kihou thei tai. Nacha chu kipamana Pathenin napeh ahile alung sunga chu ipi pi nakhum peh em ? Mi loi khat in acha lungsunga B.A., M.A., akhum peh in, officer khat ahung hi teng anu apa vah in ahung pang jie. Amasa pena chate lunga Pathen thu khum ding, nule pa ngai lut je Pathen ngailut je, golle pai ngailut je khum peh ding ahi. Hicheng na khum chun nangma nahin choi-at ding ahi.

Minu mipa kihoulim khom naa abang teng, “Keivang, kachapa jungol vei ahin, iti kagenthei hitam, an-nemo twi donmon eilhauvin, ka thil kalo jouseu asuse gamtan, iti ka inchen hitam, kalung adonge” tia aume. Acha lung sunga thilpha ana khumlou ahitai. Acha chu ama dia amelmah ahitai. Mi abangin, “Ka sum nei kagari nei ho jeh-a, iti ka genthei hitam, kachapa kagin jitoh,

gucha ho kagin toh, miphalou ho kagin toh kichatnan kadimin katahsa jong agong tultul jenge” ati jiuve.

3. *Gou number thum* : Na inneipi chu nagou lupen ahi. Na inneipu chu nagou ahi. Pathen lekha bun, numei na inneipu chu nahuhhing jou ding hinam, pasal na inneipi nahuhhing jou ding hinam ? ati (1 Cor. 7:16). Adam in ajinu akichin phat lou jeh in, gollhang satan thu ana ngai-in neh lou ding theiga anane tai. Hiche bang in, mipa tamtah in aji akichin them lou jeh in, kinah, kitomo, kida, kitihoh atame. Iji lung sunga khum dia pha chu - ngailut (lungset), Pathen ngai lutna, chamna thupha, lungmonna thu khumpeh ding ahi.

Tun gou lupen sei ute :

i) Pakai Jesu hi, goulou pen in neile chun anunnom nahi ding ahi. Jesun, kei-a umun, kei jong nanghoa ka um ding, nagot chan thumun, kipe ding nahive, ati (John 15:7). Khutdo nu mei khat hi lengpan adei chan, asoh ho asolin agapui sah tai. Mihon khu che khutdo nukhu, tia anuisat jiu ana hi. Ahinla khutdo nu chu, leng inpia lengnu ahidel tai. Koiham tua khutdo nu tingam dia ? Hiche banga, sopi nangin jong, Jesu neile chun van khopia nachen-a, koiman nanoise lou ding ahitai. La khat in, “*Jesu nei hinna nom, mihao ten neijou lou, miching hon ahe thempoi. Jesu nei chihna bulpi, Jesu nei haona bukim, Jesu nei vannoi toh ki khen na*” ati. Vannoi toh nakikhen

nom leh Jesu nei in.
ii) Bible hi gou lupen in nei in. Lha so louvin nei in, chutile nalungdon ni le nalhamon thei, naka nile nalhem bi thei, nakipa nile nakipapi thei, na thi nile vana napuilut thei ahi. Pathen thu hi hing jing leh natong hat jing, alang nia hemto chemjam jouse sang a hemjo ahi (Heb. 4:12). Satan gal hang pen doujouna ahin, chonsetna ding lampi peldohna leh van lampi hoitah-a nahil thei gou lupen ahi.

iii) Vana lhagao gou khol ding : Jesun, vana gou nanei nom le nanei chengse joh in lang, mivaicha gen thei te gahoppeh in, chutile vana gou nanei ding ahi, ati (Mt.19:21). Mi haopan agou a-it tan, ajam doh tai. Jesun, veuvin, mihao van gam lut iti hah hitam, mihao van gama alut sang in, heubil homa sangong sao lut abai joi, ati.

iv) Jesun nangho cheuvin mi jouse seijui in gasemun, anati (Mt.28:19). Lhagao mangsa Pathen henga pui lut chu gou lupen Jesun ei ngaise nau ahin, akipana jong ahi. “Khutgoh keova kache ding ham, eilhatpa lam to dinga, ana nikhat jong tong louva, kache ding ham khut goh-a!” Lhagao mangsa ho cross phunga lhut-ute, kelngoi hon lah-a lhalut ute, hi chu idiuva vana lallukhuh sanna hi ding ahi.

Vana gou khol hon, van gam bou agel jiuve. Leiset angai tapouve. Nangin, vana gou nakikhoh hinam ? Nagou umnaa nalung umding ahi.

(Rev. Seikholen)

Egypt a kon Israelte

Tulai paova seidin :- Mose in Egypt a kona Israel te ahin puidoh chu atame. Ahin puidohna kum hi 1440 B.C. hinte. Mi chu numei chapang sim louvin lakh gup vel ahi (Exod. 12). Amaho neh ding hi nikhat-a anchang Kgs. lakh 15 ngai intin, hichu maal train ni dimset hinte. An ahonna diu thing hi nikhat in Kgs. lakh 40 ngai inte. Israel te chu gamthip-a kum 40 vah leu ahin, twi adon diu le akisilna diu tampi lut inte. Nikhat a don diu le akisilna diu twi Liter crore 5 ngai inte.

Jan lai-a Red Sea (twi) apal na diu chun, mi ni nia kijot hitaleu Kms. 1,000 sao diu ahi. Kenga che ahijeh un, Red Sea apal kah-u chu nikho sunle jan 35 lut inte. Agom uva jankhat kah-a twi chu apal gal kai diu hileh alamjot nau lampi chu avai kilometer thum ngai inte. Mi chujatpi kingahpana mun jong len tah hiding ahi, square Kms. 1200 vel alo diu ahi. Mose in Egypt a ko na Israelte ahin puidoh tengle neh ding chah ding, don ding, gena ding ho hi gel masaleh ngapcha ponte. Ahinla Mose hi Pathen tahsan mi ahijeh in, Pathen asongin, ima jouse Pathenin ngaito nante, tichu akinep na anahi. Chule Pathen din ima jou se ahi thei-e. Pathen dia ima ahah sa aumpon, hijeh chun Israel chate mi chujatpi chu, lamkah-a athi nile thum anaum vangun phaten Canaan ana lhung tauvin ahi.

7

Bible hung kitadoh dan

Pathen lekhabu theng Bible Hebrew paova kona Kuki paova hung kile doh thei dan, themkhat veu hite. Kuki nam hi pao lhongpi khat a kihou thei, gam vaiposa ahin, pao bah tampi um jongle aboncha chu Kuki pao ahicheh-e. Agamkai jeh ha, ipi jeh hama pao min chom chom kinei ahi. Hiche pao lhongpi jonghi, (1) Thadou pao, (2) Khongsai ham, chule (3) Haokip chong tia pao khat chu min thum jenna kiminvo kha ahi. Adang pao bah ho jong alhongpi tha khat ahi cheh vanga min chom chom a kisei ahiuve.

1) 1964 kuma chu, Kuki Baptist Convention makai jala, (1) KBC, (2) KCA-Manipur, (3) KBA, Naga Hill, Assam, (4) Ngalsong Presbytery - Assam, (5) KCBA, (6) KVTBA - Burma, khoppi gup, Kuki pao lhongpi (common language) thokhom chengsen Kitepna Lui (Old Testament) ledoh-a chule Kitepna Thah (New Testament) thah ledoh dinga, kei (T. Lunkim) eilhen uva, May 1964 a pat hung kilepan ahitai.

(a) Bible Kuki paova ledohna dia Pathen thilgon :

(i) Kei (T. Lunkim) eina gondol hi, amasapena school kailou, mi het-a lekha simloupa chu Bible ledoh ding a, Bible eina simsah chu ahi.

(ii) Serampore College a Pre-B.D. kasima pat in Greek pao le Hebrew pao kasimin, katha anomin, phate

chan kasimdoh in, asangpen in kapa change.

(iii) Pre-B.D. chu *distinction* a pass kahin, B.D. kasim pai tai. B.D. kachai kon April, 1964 chun, KBC General Secretary Mr. D. Singson a kon Bible le-a eipansah nom nau lekha thot kamui.

(iv) Bible Society of India, Bangalore a, Pu Rev. C. Arangaden, Translation Secretary a konin Bible Kuki paova ledoh din temna kana mupai tai.

(v) April, 1964 kichai lamin, B.D. Exam. kachai phat in, ka-in Litan (Ukhrul Road) a kahung in, ijakai akisuh toh jouvin, Kuki Christian Council a tongkhom, KBC, KCA, KBA, KVTBA, KCBA chule Ngalsong Presbytery, khoppi gup in kitoh tah-a Bible le-a kapan ding akinopto soh phat un, May, 1964 a pat Bible kahin lepan tan ahi.

(b) 1965 January lha'n Imphal a, Kuki Christian Council kikhopnaa Bible Society of India henga tohman eipeh diuvin, KCC President Mr. Khupjapao Singson in lekha athot tai.

(i) 1965 lhung kei-in Litan (Ukhrul Road) a Bible kanalen, hikoma Mongkot High School boldoh toh kanathoi.

(ii) April, 1966 chun Dewlah Land, Imphal a Pu T. Hangsing ina kahung kichonin, Bible kalen, type eibol hu din Mr. Khol-hen Khongsai apange.

(iii) Abanin Mr. M. Haokhothong, B. Com. in D.M. College a jan-a

8

M.A. asima, suna a-on jeh in, type bolin ana pange.

(iv) Mr. Tinjathang Khongsai (tua thita) aman Bible kiledoh ho type ana bole.

(v) November 24, 1966 ni jingkah in, Police hon eihung manun, Imphal Central Jail a eikoi tauve.

(vi) January 7, 1967 chun Jail a konin kahung potdoh in, June 1967 in UTC, Bangalore a M.Th. (O.T.) sim din kache tai.

(vii) July, 1967 chun Gurukul, Madras a M.Th. (O.T.) kanasim panin, April, 1968 in Nagaland ka hin jonin, June 25 gei-in Nagaland a kana umin Bible kanalei.

(viii) June 26, 1968 chun Imphal kahung lhung in, 1969 gei-in Pastor Satkhosei Thangeo toh kithon Bible kalei. Oct. 1970 a pat January, 1971 gei in, Faridabad, Haryana muna Thomson Press a Bible tatdoh din Pastor Satkhosei toh katham lhone.

(c) June 20, 1971 nikhon Nagaland a Molvom khoa, Kuki paova kile doh Bible "Pathen Lekhabu Theng" akithenso tai. Bible thensonaa hung pang ho chu : (1) Dr. M.P. John, Deputy Secretary, BSI, Bangalore, (2) Rev. Phillips, Auxiliary Secretary, BSI, Shillong chule (3) Rev. Longri Ao, NBCC General Secy. (Nagaland), ahiuvin chule Manipur, Nagaland, Assam le mundang dang a kon Kuki Christian Council mi sangval ahungun, Bible copy 1000 kitatmasa chu akichu khop tapouve.

(d) Bible kilenaa melchih ding phabep :

(i) Kuki paova kiledoh Bible hi, akijihna Hebrew (Biblical Hebrew) paova kona kiledoh ahi. Hichea ki langdoh chu -

(a) Kukite lah-a kisonpi tah tah ho jou akilang doh-e. Ajeh chu Bible kile chu English a toh avetkah uva akito lou leh ken kale-khella aseijengu ahi. Hebrew pao toh akito pou leh adih ahi chu agelpha ji pouve.

(b) Bible hi English paova kum 1611 A.D. lama aneipat-u ahivang in, aledoh theilou-u phabep anei nahlai-u ahi (Gen.33:20).

(ii) Kuki paova Bible kiledoh dei lou, adih louna sei atamjo hi “kuki pao” kiti lai deimo ho ahiuvin, ahethkelu chu --

(a) Kuki Literature Society, Dec. 27, 1937 nikhoa Kangpokpia ana phudoh uva, Pu Ngulhao Thom-song, Chairman a panga, Ms. Ngah-khokim, Secretary a panga Kuki mi na anabolu ahi.

(b) KLS meeting Sept. 10, 1938 a Kangpokpia akikhop nauva Pu S. L. Lunneh, Chairmana panga, Pu Lalthattong Misao, Secretary hinaa apao hi “Kuki pao” atiu ahitai.

(iii) Oct. 24, 1958 nikhoa jong Motbung a KLS kikhopnaa “Kuki pao” tia kilolna banga kibol ahitai.

(iv) Kitepna Lui akichai chai-in, Pu Ngulhao ledohsa Kitepna Thah

chu thahle kit din Bible Society in aseikit-un, Kuki Christian Council chun Translation Committee din -

(a) T. Lunkim - Revisor,
(b) Pastor Satkhosei - Stylist,
(c) Rev. Seikholet Singson - Member,

(d) Rev. Hawlngam Haokip, B.D., KBC General Secretary- Member,
(e) Mr. Jangthong Haokip, B.A, B.D. - Member,

(f) Mr. Haokhothong Manchong, B.Com, B.D. - Member, eilheng doh uve.

(v) Kitepna Thah, revision chu aki chai in, 1994 chun akithenso tai. Hiche *revised text* a hin --

(a) Penthah kipai-in akisei in, chom khat aboiman-e.

(b) Penthah thudol John 3:3 a kiseinaa hi, ‘pengkit ding’ atijoh ahijeh a, ‘penkit’ tia kikhela, *athah* lai ‘penkit’ a kiledoh jo ahin, akibol khel aumpoi.

Mipin het tei-tei ding chu, Bible Society in aphai tia akithenso jou tengle, adih-a gela manchah ding ahi. Angai leh *revise* kibol kit ding ahi. Revise bol masanga adihlou hea aum jongleh sei loulai ding ahi. Ajeh chu mi khat in dih louva aseijeh-a adangin asim thaset lo ding chu adihlou, mi achonset sah ahin, ama chu angonga sumhei song kikhai hen twi-a kilehluh leh phajo dia Pakai Jesun aseichu geldoh tei ding ahi (Mark 9:42). Hia kisei ho hi 1959 lama pat *file* ho le record hoa kona hung kisei son ahi. (Dr. T. Lunkim)

Nui-ji hi Damna

* Sunday school ojapu kithepsah tah khat in, chapang ho henga, gan cha ho ngailut ding anahile. Athusei achaina in, “Migilou khat in mengcha mei chema asattan, namutai. Achuti leh Bible dung jui-a amapa henga ipi nasei ding ham ?” anatin ahile chapang khat ahung ding doh in,

“Ojapu, Mat. 19:6 a kisun, Pathen janggopsa chu mihemin sukhen hih hen, tihi kasimkhum ding ahi” ahinti.

* Haopu henga apan, chen lang lum tan, tou tou hih in, ajole Bompohung intin, aboma nahet-a nakipoh mang ding ahi, atile Haopun apa aven, “Hepa, Bompo chu namu khah tah em” tia adohle apan, “Iti kamuda ding ham, kum nga kahi laia kanamu ahitai” ahinti.

Chuin achapan “Hepa, kum nga nahi lai-a namu vang chu tun tehse lseh tante. Ken jou nange, ima seibe datan” ahintile, apan seibe ding aheta poi.

* Science Teacher pan chapang ho henga, “Hiche leiset a hin twi um tahih leh ipi asoh tadem, gel temun” atile bongnoi johpa chapang, “Ojapu, achutileh keiho insung kaboi diu ahitai. Ajeh chu kapan bongnoi tui toh halding twi aneilou ding, kavaichat cheh diu ahitai” ahinti.

* Sardar mini hin guhthimin Car noi a Bomb khat akhai lai hin, khatpa chun, “Golpa, bomb hitia nakanbeh

pet chun hung pohkeh tale, iti tan tem !” aloipa chun jong, “Olmo hih in sopi, Bomb achom khat jong ka nei nalai-e, hichu kakanbeh leh ki chai, ahi” tin baithet in ana sei-e.

* Achapa school a kona ahung ki le phat in, “Na Exam result iti nam” tia adoh leh achapan, “Hepa, mark 500 kamu” anati.

Chuin apan subject ahang changa mark ijat jat namu ham, tia adoh leh achapan, “Hepa, English a mark 5 kamun, Maths a mark 0 kamun, chule science a mark 0 kamun, agoma 500 ahi” anati.

* Court a thutanpan guchapa henga, “Nangin mi thil naguh chu najah cha lou ham ?” tia aseileh guchapan, “Kajah achanai, Sap” ati. Chuin thutan pan, “Jachat nahet leh idia gucha khoh nahim” tin adong kit in ahile guchapan, “Pu, kaguh pet chun aphanai, kaguh jouva kajachat pia, kajam leh min eidela eikiman kha ahibouve” ahinti.

* Sardar pan dukan dar pa konin Radio khat ana choi. Nikhat dukan dar pa henga ahungin “Neijou lhep tai” atile dukandar pa chun, “Hoi-a kajou lhep ding ham, Radio hoitah kachohsah nahijoi” ati leh Sardar pa chun, “Hoija ge chuti di ham, na Radio chung a ‘Made in Japan’ kisuna, ahiala Radio chun thu ahin sei a chu, ‘This is All India Radio’ ahinti bouva chula” atin alung han pumin akinah pitai.

Het-a Phachom

11

* America a akum 16 hibep Grace Bush, tun Bachelor of Law pass ahi tai. Amanu hin USA a Chief Justice hi ding katup ahi, ati.

* Nigeria gam sunga kho phabep a nat khohtah adamna ding umlou lai **Ebola** nat tulai tah hin alangsen, ni khat in mi 30 cheng athiuvun, adam lou akibe ben, athi jong atamcheh cheh-e. India a Nigeria mi hung lut ho doctor in avechil in, lenna a mi gama kona India a hunglut ho, aha vetchil ui.

Delhi a hiche natvei ginmo mi khat amudoh uve. Titho, khosih hoa kipana, ati bola jun juna thi ji ahi, atiuve.

* Tulai hin, von, furniture, lou, electric thil, *advertisement* ahah l'eh in, newspaper, magazine, mihem kam, TV, hoa kona, thil kijoh ho sei phatna akija jinge. Aki advertise dan hi mi thanopsah-a, athil chohsah tei agot-u ahin, phatea kholchil jouva itahsan dingle tahsan ngai ahi. Ching thei un, kijou l'hepna atam-e.

* Kum 2015 leh plastic *note* (tua lekha sum note khela) hung kistem pan ding ahitai. Kochi, Mysore, Jaipur, Bhubaneswar a plastic a kistem dangka somkhat note tukum chesah pan ding akiti. Australia a ana kimang panin, tun migam dang phabep-a aki mang tai. Lekha note ho, miphalou hon asemthu thei ahin, plastic note hi koiman asemthu (fake) theilou, kum nga sunga selou hel ahi.

* Houbung lamkai ten, christian nu mei ho Pathen houlou toh akichen jeh in, India a christian mijat alhom sah in, inumei houhi hou kibahpi toh akichenu angai-e, tin lunggel aneipan tauve.

* ATM a sum nakilah teng Receipt lekhabeh chu kilah dajin, ajeh chu hiche lekha hi Bisphenol A (BPA), Bisphenol B (BPS), stabilizer chule adang chemical hoa kona kistem ahi jeh in, Cancer nat akivei thei-e, ti thu akijai. Alekhabeh hi second 5 akituh jingle one milligram BPA ikhut-a behjeng ahi, atiuve. Migam hoa vang alekhaa BPA ajaosah po vin apha. Hiche lekhaa kona, obesity, cancer, diabetes, bad immune system, kila thei ahi atiuve. Alekha hi kilah da in, nalah ding jingle na khut in tongkha hih in.

* Gojuh lai-a keh in asekhah-a thi aum jinge. Van le leiset kijopto ahi. Akijopto pet-a akoma ana umkha mi chu akhetkhah a thiji ahi. Van agin teng, insunga naum le thih toh kinai da'n, *phone* tuhda'n, computer, TV, headset, leh electric manchah ho that (off) in.

Polama naum leh, mun nem tu'n (mun sanga um hih in), nangma jong saang hih in nemjon, mi danga konin foot 15 vel kigamat in, ajeh chu navel keh in ahinse teng agui hi tola vahjia mihem khat-a kona mi hem khat-a kichom son sonji ahi. Twi, thingphung, electric khom, leh in-vela umhah in.

12

Christian Meivah - sim ho taona akiman peh jinge. Kum 2013 a kona sumto Rs. 100/- ahitan, asim nom jousen hin peuvun, sum napeh l'haa kona kum nakisim peh ding ahi. M.O. hinthot hon Editor kipe ding lekha beh a namin le address suntei un. Editor pu Mobile No. 94355-51080. Manipur le Nagaland a sumto pehna thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahen Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, cipur.
- 7) Rev. Seikholen, Medziphema, Nagld.
- 8) Mr. Seikholun Singsit, Kohima.

Hetsah nom ho

* Microsoft Windows 8.1 hi update bola Windows 8.2 hia chu le Windows 9 hung ding ahi, akiti.

* India a cancer nat tamna pen Mizoram ahin, abanin Assam ahi. Mizoram a oisung cancer atamin, Assam a kamsung cancer atame.

* Nail polish akinu leh ahalsi oi sunga kivallut aumkha jin, hichun cancer le thajung natna mi apei.

* Mot (banana) hi diabetes vei in aneh le kintah in chini (sugar) asem jie. Pineapple, dates, water melon, raisin, papaya, apricots, hon sugar asem gang in, daibetes hon ngol leh apha.

* Jan imut teng meivah vah sanga muthima ihmud damna ahijoi.

Christian Meivah
September - October, 2014

PRINTED MATTER

To :

Editor :
Rev. M. Haokhothong,
C/o, Tingjanem Manchong
Nichols High School, Satibari, K.C. Road,
P.O. Rehabari -781008, Guwahati, Assam.